

重刊元祿本
廬山記五卷

東方學會印

廬山記序

余昔者讀書山中愛其泉石塔廟之盛而恨圖志之不詳遺古略近或出於愚夫野老之語言鄙辭贅可取者無幾將討論刪次之未皇暇也後二十年讎書祕閣得廬山記欣然以喜以爲夙願獲遂而考其所載疏略尤甚熙寧五年嘉禾陳令舉舜俞謫官山前酷嗜遊覽以六十日之力盡南北高深之勝書行山間授毫折簡劬鈔四詰小大弗擇夜則發書致之至可傳而後已其高下廣狹山石水泉與夫浮屠老子之宮廟逸人達士之居舍廢興衰盛碑刻詩什莫不畢載而又作俯視之圖紀尋山先後之次泓泉塊石無使遺者成書凡五卷後三年余守吳興令舉扁舟相過以余山前之人也出稿見授請鏤諸版藏之山間會余蒙恩移濟南遽與之別令舉尋復物故余益以事役奔走四方思一旋歸茫不可得輒序其撰述之勤貽好事君子庶幾成令舉之志云朝散郎充祕閣校理李常序

予雅愛廬山之勝棄官歸南遂得居於山之陽游覽既久遇景亦多或賦或錄雜爲一編將欲次之而未暇也熙寧中會陳令

舉以言事斥於是乎山林之嗜既同相與乘黃犢往來山間歲月之積遂得窮探極觀無所不究令舉乃採予所錄及古今之所紀耆舊之所傳與夫耳目之所經見類而次之以爲記其詳蓋足以傳後予材不可以應時宜退老於林野令舉以制策擢上第名聲赫赫世任不卒歲乃廢於筦庫而與予共見於此記甚可惜也然推古以較今豈特一令舉爲可惜哉江西劉渙序

廬山記

卷一

尚書屯田員外郎嘉禾陳舜俞令舉撰

總叙山水篇第一

案太史公曰余南發登廬山觀禹九江前漢郊祀志云乾封中武帝浮江自尋陽出樅楊過彭蠡禮其名山大川桑欽水經云廬江出三天子都北過彭蠡縣釋惠遠廬山略記曰山在江州尋陽南南濱宮亭北對九江九江之南江爲小江山去小江三十餘里左挾彭蠡右傍通川引三江之流而據其會山海經云廬江出三天子都一日天子障故舊語以所濱爲彭蠡有匡裕先生者出自殷周之際遯世隱時潛居其下或云裕受道仙人共遊此山遂託空崖即巖成館故時人謂其所止爲神仙之廬因以名山焉其山大嶺凡有七重圓基周回垂五百里風雲之所攄江湖之所帶高崖反宇峭壁萬尋幽岫窮巖人獸兩絕天將雨則有白氣先搏而瓔珞於嶺下及至觸石吐雲則倏忽而集或大風振崖逸響動谷群籟競奏奇聲駭人此其變化不可

測者矣衆嶺中第三嶺極高峻人跡之所罕經也昔太史公東遊登其峯而遐觀南眺三湖北望九江東西肆目若陟天庭焉其嶺下半里許有重巘上有懸崖傍有石室卽古仙之所居也其後有巖漢董奉館於巖下常爲人治病法多奇神絕於俗醫病愈者令栽杏五株數年之中蔚然成林計奉在民間二百年容狀常如二十時俄而昇舉遂絕迹於杏林其北嶺西崖常有懸流淫淫激勢相趣百餘仞中雲氣映天望之若山在宵露焉其南嶺臨宮亭湖下有神廟卽以宮亭爲號安侯世高所感化事在叙山北篇七嶺同會於東共成峯嶸其崖窮絕莫有昇之者有野夫見人著沙門服凌虛直上旣至則回身踞鞍良久乃與雲氣俱滅此似得道者當時能文之士咸爲之異又所止多奇觸象有異北背重阜前帶雙流所背之山左有龍形而石塔基焉下有甘泉涌出冷暖與寒暑相變盈減經水旱而不異尋其源似出於龍首也南對高岑上有奇木獨絕於林表數十丈其下似一層佛浮圖白鶴之所翔玄雲之所入也東南有香爐山孤峯秀起遊氛籠其上則氣若香煙白雲映其外則曷然與

衆山殊別天將雨其下水氣涌起如車馬蓋此卽龍井之所吐其左有翠林青雀白猿之所憩玄鳥□□之所蟄西有石門其前似雙闕壁立千餘仞而瀑布流焉其中鳥獸草木之美靈藥方物之奇焉可得勝名哉略舉其異耳劉昭注續漢志酈道元注水經並用惠遠語又豫章舊志云裕字君平夏禹之苗裔也或曰字君孝父東野王與吳芮佐漢定天下而亡漢封裕於酈陽曰越廬君裕兄弟七人皆好道術遂寓精於洞庭之山故謂之廬山張僧鑒尋陽記云山南有三宮所謂天子都也廬宮溪水出焉上宮人所不至有三石梁長十餘丈閣纔盈赤其下無底其中宮在別巖悉是文石兩邊有小圓峯奇特號爲右障峯石形若羊馬來道相對下宮彭蠡湖際宮亭廟舊所也山高二千三百六十丈周回二百五十里其山九疊川亦九派郡國志曰廬山疊障九層崇襄萬仞懷靈抱異包諸仙跡尋陽記又云秦始皇七十年東登廬山以望九江上霄峯以與霄漢相接因命之峯後有刻石云是夏禹所刻丈赤里數文字不可辨伏滔遊山序曰廬山者江陽之名嶽其大形也背岷流面彭蠡蟠根

所据亘數百里重嶺殊嶂仰挿雲日俯瞰川湖之流焉王彪之
山賦叙曰廬山彭澤之山也雖非五嶽之數穹隆嵯峨實峻極
之名山也孫放山賦曰尋陽南有廬山九江之鎮也臨彭蠡之
澤接平敞之原張野記曰天將雨則有白雲或冠峯巖或亘中
嶺俗謂之山帶不出三日必雨每雨其下成潦而上猶皎日峯
頭有大盤石可坐數百人以上皆述此山也宋支曇諦賦云昔
哉壯麗峻極氤氳包靈奇以藏器蘊絕峯乎青雲景澄則巖岫
開鏡風生則芳林流芬嶺奇故神明鱗萃路絕故人跡自分巖
清升山於玄崖世高垂化於邾亭應真凌雲以踞峯眇忽翳景
而入冥咸豫聞其清塵妙無得之稱名也若其南面巍崛北背
苕帶懸霤分流以飛瀾七嶺重嶸而疊勢映以竹栢蔚以檉松
縈以三湖帶以九江嗟四物之蕭森爽獨秀於玄冬美二流之
潺湲津百川之所衝峭門百尋峻闕千仞香爐吐雲以像煙甘
泉涌霤而光潤梁元帝序曰夫日月麗天皇穹所以貞觀川岳
帶地后土所以推寧廬山者亦南國之德鎮雖林石異勢而雲
霞共色長風夜作則萬流俱響晨颺曉吟則百嶺齊應東瞻洪

井識曳帛之在茲西望石梁見捐寶之可拾誠復慕類易悲山中難之攀蘿結桂多見淹流其餘古今賦詠不可備載實天下之名山也江州在山北二十里本在大江之北尋水之陽因名尋陽今蘄州之蘭城卽其故地咸和九年刺史溫嶠始自江北移於湓城之南義熙元年刺史郭昶移居江夏八年孟懷玉還治尋陽太清二年蕭大心因侯景之亂欲依險固乃移於湓口城仍號懷玉舊城爲故州張僧鑒尋陽記云湓口城灌嬰所築漢建平中孫權經此城命鑿井適中古磬得石函銘曰漢六年潁陰侯開卜云三百年當塞後不百年當爲應運者所開權欣然以爲已瑞井極深湓江有風浪井水輒動邦人因號浪井故李白下尋陽城泛彭蠡詩云浪動灌嬰井尋陽江上風今井在衙城內之西圃城上有北樓下臨湓江憑高眺遠爲一郡之勝陳散騎常侍張正見湓城詩云匡山曖遠壑灌壘屬中流城花飛照水江月上明樓案晉書庾亮傳云亮在武昌諸佐吏殷浩之徒乘秋夜共登南樓俄不覺亮至人將避之亮曰諸君少住老子於此處興復不淺便據胡床與浩等談詠竟坐則事在武

昌之南樓也後人以亮嘗爲江州刺史因名此曰庾樓實非常時秋夜所登之遺址也是郡前世或號九江或號尋陽唐襄楊氏李氏代有其地升爲奉化軍節度皇朝開寶四年平江南降爲軍州事太平興國三年升星子鎮爲縣仍隸焉七年割星子與建昌都昌王縣置南康軍於是山南屬南康山北屬江州矣

叙山北第二

由江州之南出德化門五里至延壽院舊名羅漢壇過延壽院五里至石塘橋有濂溪周郎中之隱居周名惇頤字茂叔道州人任官有才略早慕高名樂廬山之勝因家尋陽之別墅于附郭自名曰濂溪過濂溪東入寶嚴禪院十里北至太一觀亦十里寶嚴舊曰雙溪景德三年賜今名院當官道吳乾貞二年僧常真始基焉常真荆南人姓田氏人謂之田道者勤身耕廩以待四方遊者二林僧脩睦號楚湘東西二林監寺譚論大德官命廢省庵舍睦謂之曰今撤子所宇則何歸乎田曰本是林下人却歸林下去睦異其言因則敬待贈之詩曰入門空寂寂眞箇出家兒有行鬼不識無心人謂癡古巖寒栢對流水落花隨

欲別一何懶相逢所恨遲由是歷南唐爲山中之表字顯德六年元宗賜田使給諸庵岳無田者歲取其糧者二十六庵岳南抵吳章嶺五里由嶺下北行一里道西有雲慶庵舊名雲鏡因流泉爲池多畜魴鯉歲已久游泳甚狃由雲慶西一里至寶積庵松竹蒙密白雲亭在其上北望湓江盤石可坐數人鳴泉過其下此山北僧庵之最佳者雲慶寶積皆在寶嚴之南由雲慶還寶嚴亦三里寶嚴之東十五里有下龍泉院太一觀北別有龍泉庵此以下別之由龍泉十里至尊勝庵由尊勝庵八里至白鹿臺由白鹿臺十五里至仁壽院由仁壽十里至香積院由香積三十里至長嶺院長嶺者彭蠡湖之別嶼也凡下龍泉至香積非在山間然山人野客窮覽幽遠皆嘗至焉水聲野色有足佳者香積之西二十里有山南開先寺之場圃曰大富莊過大富則遊山之南矣寶嚴之西一里至龍池庵舊名冒峯由冒峯五里至庵岳莊由庵岳莊一里至禪智院舊名淨居其後有綠野亭由禪智五里至大中祥符觀舊曰太一宮祥符中賜今名葛洪神仙傳曰董真人名奉字君異閩中候官人少有道術

交趾太守士燮死已三日奉以一丸藥與服以水含之捧其頭
搖梢之食頃開目動手顏色漸復半日能起坐四日能語遂復
常後居廬山治人之疾不取貲幣使愈者人植杏五株數年鬱
茂成林奉乃作倉廩宣言人貿杏者不須來報但一器杏償一
器稻人有欺者猛獸輒逐之所積稻復以施人後上昇號碧虛
上監是觀即杏林之故地也唐昇元六年徐知證作真人廟記
及有保大十二年記今存焉氣象蕭然過者敬而不敢褻沼泉
游魚尤爲蕃狎或曰真人杏林在山張景詩云桃花謾說武陵
源誤殺劉郎不得仙爭似蓮花峯下客栽成紅杏上青天今蓮
花峯在觀後觀之北五里有龍泉庵初遠法師至于廬山愛此
間曠欲結庵焉地無流泉師以杖刺地應時泉涌浸爲溪流既
而尋陽歲旱遠師誦龍王經于池上俄有龍起而上天雨乃大
足故號龍泉龍泉之南十里有妙智院舊名行春亭由妙智五
里至虵岡高僧傳云安世高安息國王之太子讓國于季父而
出家漢魏間行達邲亭湖時湖神能分風上下舟人敬憚因與
同旅三十餘船奉牲請福神忽降祝曰吾昔外國與子俱出家

學道而性多嗔恚故墮神報今見同學悲欣不可勝言世高請
神出形神乃出大蟒頭不知尾之長幾世高向之胡語贊唄數
番蟒悲淚如雨須臾還隱廟有絹千疋并雜寶物世高爲持去
豫章造東寺焉後人於山西澤中見一死蟒頭尾數里今尋陽
郡虵村是也故名其高曰虵岡虵岡之下五里至太平觀太一
觀之西南二里又有國泰庵其西上有蓮花峯十里峯頂有蓮
花由國泰五里至報恩庵由報恩一里至雲際庵由雲際二里
至永清庵亦名下蓮花庵永清之湖北有牛道人隱居由永清
之西一里至雲溪庵亦名蓮花洞自大一觀至雲溪凡佛老之
居八同在蓮花峯下由雲溪二里亦至太平觀唐號九天使者
眞君廟南唐昇元元年賜名通玄府本朝興國二年賜今名錄
異記云唐開元十九年八月二十一日玄宗夢神仙羽衛千乘
萬騎集于空中有一人朱衣金冠乘車而下謁帝曰我九天探
訪巡綽人間欲於廬山西北置下宮木石基址素具但須上力
耳帝卽遣中使詣山西北有基址宛然信宿巨木數千段自然
而至堂殿廊宇隨類致木皆得足用或云此木九江王所採擬

作宮殿沈於湓浦至是浮出赭堊丹黃鑿廟北地得之綵飾備足既而建昌渡有靈官五百餘人若衣道士服者皆言詣使者廟因圖像于壁或曰明皇始以夢告左右左右不信俄有神降于庭綵雲乘足儀仗符衛甚偉明皇命吳道子走筆寫之其所立像卽依倣焉始置廟記李泚撰泚自稱蘄州黃梅縣東山衡門之下草茅臣開元二十年歲次壬申正月乙巳朔二十五日己巳立其略曰勅置廟使內供奉將使者眞圖建立祠廟章醮行道設醮使大弘道觀法師張平公使持節江州諸軍事守江州刺史獨孤禎朝散大夫行長史楊楚王行司馬皇父楚玉尋陽縣令魏昌同護修奉焉又有使者祥驗記開元二十年壬申三月八日辛亥宣義郎行彭澤縣尉潘觀撰述祥驗之事五略曰江水泛溢吹楫近山計木纔登水復舊一也野竹散材則連岡距谷丹粉雜色則冗出崖生二也謝土之夜風雲空潛仙燈遠照三也渡彭蠡湖謁廟者數百人舟人所得翊日皆紙錢四也騎從龍虎刻削馭人或土或木入廟成列忽有汗出其面者五也其碑歲久訛缺治平三年重立復有張靈官記靈官名懷

武葵之裨將嘗有陰功及物帝命爲靈官廟壁之像五百人張其一人焉事詳本記癸酉歲開寶六年上元日御史大夫徐鉉撰右內史舍人集賢學士徐鉉書辭多不載觀門之左有劉越石至道中郡守考功員外郎孫邁始立碣置祠焉昔匡裕廬于山有少年屢詣之自通曰姓劉名越家在前山之左邀裕過之且曰至山下有石高二尺許卽予居可叩之裕後如約而往至山下四顧無居室果惟一石乃叩之石爲之開因遇神仙洞府之事慧遠記云裕受道於仙人者蓋謂此也觀旁有仙鄉亭下視樓觀儼若洞府遊者皆登焉太平觀之西南五里有清泰庵由清泰一里至廣澤院舊名龍潭三龍潭在院之東南之山上五里若歲旱郡縣必禱焉由廣澤下山至太平興國寺七里寺前之水曰清溪上有清溪亭寺晉武帝太元九年置舊名東林唐會昌三年廢大中三年復皇朝興國二年賜今名法師諱慧遠俗姓賈鴈門樓煩人師道安於恒山爲安高弟始住荊州上明寺後欲之羅浮道由廬山居龍泉精舍去東林十五里而遠旣而學侶寢衆同時惠永禪師已居香谷山請結鄰好刺史桓

伊亦所欽仰乃置寺焉事具寺碑開元十九年七月十五日前
陳州刺史季邕撰并書會昌三年僧雲臯始刻石焉時裴休爲
江南西道觀察使張又新爲江州刺史實助成之裴題其篇末
云覽北海詞翰想見風采張亦作記于碑陰大中十年四月十
三日沙門玄觀請河東裴光遠篆額光遠國子監太學博士初
遠師欲徙香谷也山神告夢曰此處幽靜足以棲神忽於後夜
雷雨震擊明且視之惟素沙匝地兼有楸枏文梓良木旣作殿
故名神運牛僧孺大和四年自武昌還朝過之爲書其榜神運
之殿四□有木數尺南唐元宗題曰神運木今並存焉會昌中
寺與林木並係戶部毀賣大中興復刺史崔黯爲捐私錢以倡
施者搢紳從者數百人姓名爵里今刊于石仍藏當時之疏亦
崔之詞也崔又作復寺碑左散騎常侍柳公權書流泉匝寺下
入虎溪昔遠師送客過此虎輒號鳴故名焉時陶元亮居栗里
山南陸脩靜亦有道之士遠師嘗送此二人與語道合不覺過
之因相與大笑今世傳三笑圖蓋起於此神運殿之後有白蓮
池昔謝靈運恃才傲物少所推重一見遠公肅然心服乃卽寺

翻涅槃經因鑿池爲臺植白蓮池中名其臺曰翻經臺今白蓮亭卽其故地遠公與慧永慧持曇順曇恒竺道生慧叡道敬道曇曇說白衣張野宗炳劉遺民張詮周續之雷次宗梵僧佛馱耶舍佛陀跋陀羅十八人者同修淨土之法因號白蓮社十八賢有傳附篇末池上昔有文殊瑞像閣今像亡閣廢有文殊殿瑞像者晉陶侃初爲廣州刺史海濱漁人見夜有光艷遂網之得金文殊菩薩之像旁□髣髴矣有誌云昔阿育王所鑄後商人於東海亦獲圓光持以就像若彌縫焉侃以送武昌寒溪寺主者僧珍常往夏口夢寺火而像屋獨有神物圍繞珍馳還寺果已焚惟像屋並爲風濤所溺時荆楚爲之謠曰陶惟劍雄像以神標雲翔泥宿邈何遙遙可以誠致難以力招至遠公剏寺乃禱於水上其像復出始迎置神運殿後造重閣以奉香火故李邕寺記云育王贖罪文殊降形蹈海不沈驅於陶侃迫火不熱夢於僧珍蓋謂此也至會昌毀寺二僧負像藏之錦繡谷之峯頂其後寺僧訪之藏處不獲二僧相疑或匿之俄見圓光瑞色現於空裏故至今遊人至峯頂佛手巖天池有見光相者寺